

**PERPULUNGEN LINGKUNGAN
BULAN KELUARGA JULI 2026**

**KELUARGA KATOLIK ERDALAN GUNA
NDENGKEHKEN, MPATEGUHKEN RAS
MERITAKEN NUJU KELUARGA SI ERDAULAT**



**KOMISI KELUARGA
KEUSKUPAN AGUNG MEDAN**

2026

Kata Penaruh

Ibas ngalo-ngalo minggu Keluarga i Keuskupan Agung Medan 2026 Komisi Keluarga KAM mpesikap Buku Pertoton perpulungen Keluarga segedang bulan Juli 2026. Kami ngarap buku enda banci ipake bas toto perpulungen i kerina lingkungan keluarga i paroki-paroki Keuskupan Agung Medan.

Lit pe tema bas mpebagesi pertoton enda nuju ku Sinode Diosesan VII: **Ndengkehken, Mpeteguhken ras Meritaken.** Keluarga selaku Gereja rumah tangga penting kal gunana ibas mopo kiniteken ras daulat tep-tep anggota keluarga.

Bas semangat persadan Gereja Keuskupan Agung Medan, keluarga-keluarga Katolik ipindo erdalan ras-ras, radu nedengkehken alu pusuh peraten si talang, mpeteguh sada ras sidebanna bas kekelengen Kristus, janah meritaken nilai-nilai Injil bas kegeluhen tep-tep wari.

Tema-tema si ipesikap bas 4 kali perjumpaan, emkap:

1. Keluarga erdalan ras-ras guna radu ndengkehken
2. Keluarga erdalan ras-ras guna radu mpeteguh
3. Keluarga erdalan ras-ras guna radu meritaken
4. Keluarga Katolik erdalan ras-ras janah erdaulat.

Medan, 1 Juni 2026

RP. Andreas Budianto, OFMConv

Ketua Komisi Keluarga KAM

TOTO SINODE DIOSESAN VII KAM

Dibata Bapa, Sumbul nasa Kegeluhen.
Ipuji ras ikataken kami bujur man ba-Ndu,
sabap Kam tetap mabai Gereja-Ndu,
Keuskupen Agung Medan ibas sinalsal kekelengen ras
kebenaren-Ndu.

Ibas paksa si dem pasu-pasu enda,
Kam ngundang kami, umat pilihen-Ndu,
guna ngelakoken Sinode Diosesan Pepituken
Keuskupen Agung Medan
ras ngiahken kami erdalan radu ras
guna ndengkehken, mpepaguh ras meritaken.

Mindo kami, mbera perdalanen Sinodal enda,
jadi paksa si badia nandangi kerina umat-Ndu
si nilebuh-Ndu guna erdalan radu ras
gunda ndengkehken sapih-sapih kami ras sora Kesah
Sibadia, mpepaguh kiniteken ras pengarapen erkiteken
persadaan situhu-tuhu,
janah meritaken Injil alu semangat misioner ras dem
perkuah ate.

Mbera alu pengarak-arak Kesah Sibadia,
penampat ras toto Nande Maria,
rikut toto Beato Dionisius ras Beato Redemptus,
Sinode enda erdalan sentudu ras peraten-Ndu
seh maka Gereja Keuskupen Agung Medan
banci jadi tanda situhu-tuhu kerehen kinirajan-Ndu
janah jadi Telagah Dibata i tengah-tengah Doni.
Erkiteken Kristus, Tuhan kami. Amen.

PERJUMPAN PEMENA
JABU ERDALAN RAS-RAS GUNA RADU
NDENGKEHKEN

1. Lagu Pemena

PDM No. 519

2. Tanda Silang

S. Ibas gelar Bapa, ras Anak, ras Kesah Sibadia

U. Amen.

S. Mbera-mbera lias ate Tuhanta Jesus Kristus, ras kekelengen Dibata Bapa, ras persadan Kesah Sibadia, man banta kerina kita.

U. Genduari seh asa lalap

3. Kata Penaruh

Turang ras senina kekelengen, bas perdalanen kinitekennta, mekatap kita sibuk erdalan ras erdahin, seh maka kita lupa ngadi kentsik ras ndengkehken. Wari enda, arah perbahanen Maria ras Marta, Tuhan ndilo kita ngukuri antusen kai jadi “Keluarga si ndengkehken”.

Maria milih kundul i nahe Tuhan ras ndengkehken kata-Na. Ia ngajari kita maka ndengkehken labo terjeng megiken sora, tapi nalangi pusuh ras ukurta, gelah arah renungen enda, kita ipindo gelah jadi keluarga si erpengangka uga dalanna ndengkehken Tuhan, ndengkehken sada ras sidebanna, janah ndengkehken panggilen geluhta.

4. Toto Pemena

Dibata Bapa si Perkelelng, bujur isehken kami man bandu ibas keleng ras pengarak-ngarak-ndu seh maka

kami banci pulung wari enda selaku sada keluarga simbelin bas perpulungen kami. Sentudu semangat sinode Keuskupan Agung Medan, kami ersura erdalan ras-ras bas kiniteken. Arah perbahanen Maria ras Marta, persingetilah kami gelah ula gedap bas kesibuken ngenca, tapi lalap mereken waktu guna ndengkehken sora-Ndu bas toto ras kata, bagepe ndengkehken sada ras sidebanna alu pusuh si talang ras dem kekelengen.

Erkiteken Tuhan kami Yesus Kristus, Anak-Ndu, si nggeluh ras erkuasa ras kam bas persadan Kesah Sibadia, genduari asa lalap.

5. Ogen Injil Lukas 10:38-42

6. Renungen

Turang ras senina kekelengen, semangat Sinode Keuskuan Agung Medan njemba kita guna erdalan ras-ras, radu ndengkehken, radu mpeteguhken, ras meritaken kekelengen Dibata bas kegeluhen tep-tep wari. Keluarga emkap “gereja kitik” si jadi ingan pemena semangat enda iukuri ras idalanken. Bas perbahanen Maria ras Marta, kita ngidah tangkas kerna uga dua bagin kegeluhen kiniteken ndengkehken ras ngelai arus erdalan ras-ras, labo radu siageng-agengen.

Penungkunen si rusur reh: Salah nge perbahanen Marta? Jababna: Lang, Marta labo ersalah. Marta ngalongo Jesus alu pusuh simeciho i rumahna, ia tuhu-tuhu kal erdahin guna ngelai Tuhan ras temue. Perbahanna e emkap perbahanen kekelengen siertanggungjawab. Adi Marta la ngelai, man-man e la erdalan mehuli, janah kerehen Jesus pe la ter-elai alu mehuli. Pengelan Marta emkap perbahanen simulia ras iperluken.

Si iperdiateken Jesus labo kap dahin Marta e jine, tapi pusuh peratenna. Marta jadi aru ate ras terbabani, seh maka ia kebenen kedamen ras nuntut seninana janah mandang Jesus. Kinisintungenna erbansa ia lupa maka Tuhan sielaina nge kap nenahken kedamen, labo baban.

Bas semangat Sinode si ngiahken kita erdalan ras-ras guna megiken, bagin Maria ras Marta situhuna erdalan sembabab, radu ngkuhi, ras radu nampati:

1. Bagin Maria: Waktu guna “Ngadi ras ndengkenken”. Enda me kap palas. Sope kita ngelakoken, kita perlu ndengkehken. Maria milih kundul i nahe Yesus, ngantusi kata-Na, janah mpediat pusuhna ielai Tuhan leben. Ibas keluarga bagepe komunitas Sinode, enda antusenna muat waktu guna ertoto, ngukuri kata Tuhan, ras ndengkehken sada ras sidebanna alu tutus ate.

Baginna: Arus jadi bena ras ulu. Adi la bage, pengelanta jadi kerah, kote, ras mesunah merawa bali ras Marta.

2. Bagin Marta: Waktu guna “Muit ras Ngelai”. Enda kap ulih bas pemegi nari. Kenca pusuh iisi alu kekelengen Tuhan, kita idilo guna meritaken kekelengen e arah perbahanen siteridah. Marta nggancihi tugas rumah tangga, tanggungjawab dahin, ras ngelai i tengah Masyarakat.

Baginna:

- a. Kekelengen arus diteruskan ras icidahken. Ngelai erpalasken pusuh peraten si enggo ibegiken Tuhan pagin jadi menahang, dem keriahen, ras la ngarapken balasen.

- b. Kita labo banci jadi “Maria” ngenca si sinik ertoto la kutera pe nandangi keperlun kalak si melihe, sakit, ntah pe siperlu isampati.
- c. Kita pe labo banci jadi “Marta” si sintung erdahin, janah la pernah muat waktu guna ertoto, ngadi pekesahken, ras radu megiken sada ras sidebanna.

Jabu si erdolat eme kap keluarga si meteh ndigan arus kundul sinik ndengkehken sora Tuhan ras sora anggota keluarga, bage pe meteh ndigan arus keke muit ngelai alu kekelengen. Tupung dua bagin e sembaba, maka kita jadi keluarga simaba kemalemen, bali ras semangat Sinodenta. Jesus erbelas, “Sada saja ngenca perlu”. Sada e emkap perkade-kaden ras IA. Ntah kita tupung kundul ndengkehken bali ras Maria, ntah tupung sintung erdahin bali ras Marta, kerinana arus erpalasken kekelengen man Tuhan ras man sapih-sapihta.

Mari kita erdalan ras-ras, radu ngingetken, radu nampati, gelah la lit si nggejapken baban mberat sekalak. Bahanlah waktu ndengkehken i nahe Tuhan selaku “bensin” si ngisi semangatta guna ngelai alu pusuh si meriah.

Mbera-mbera jabunta ras kerina umat Keuskupan Agung Medan ertanggungjawabna ndengkehken ras ngelai alu sembaba, guna ncidahken ayo Gereja sidem kekelengen.

7. Sharing

S. Genduari mari sipebages renungennta alu penungkunen enda guna negu-negu magiken pengalamen

1. Ndigan waktu si mehuli ras tenang kal man keluarganta guna ngadi kentsik janah ndengkehken Tuhan arah ogen Pustaka Sibadia ntah pe toto?
2. Situasi ntah pe penggejapen kai si rusur mahan kita mesera ndengkehken ukur ntah pe perngandungen?
3. Kai tanda-tanda sigejapken tupung Tuhan sanga ngerana ntah pe negu-negu perdalanen geluhta?

8. Perbahanen Teridah

S. Nentukan waktu sinik ntah ngoge Pustaka Sibadia silanglangna 5-10 menit tep-tep wari sope menai ntah ndungi pendahin.

S. Erbahan aturen: “sada ngerana, sidebanna ndengkehken” tupung arih-arih ntah ndungi masalah, alu la motong percakapen

S. Tep-tep anggota keluarga erjandi guna lebih metenget ras nungkun: “Kai si banci kusampati?” ntah “Uga penggejapenndu wari enda?”

9. Toto Perpulungen

a. Guna Kerina Peminpin Gereja

Mbera Bapa mpegegeh kiniteken Bapa Uskup, Imam, Diakon, ras kerina peminpin umat. Mbera-mbera kalak e jadi usihen si metinggel ndengkehken sora Kesah Sibadia ras sora umat siendesken man bana, janah ngasup negu-negu kita erdalan ras-ras bas persadan si nteguh.

Ertoto me kita...

b. Guna Keluarga-keluarga

Mbera-mbera tep-tep rumah tangga kami jadi “Gereja kitik’ si mehuli. Sampatilah kami gelah ula sintung sekalak-sekalak, tapi radu mereken waktu, radu ndengkehken perngandungen ras keriahen ukur sada ras sidebanna, janah sisampat-sampaten gelah dame-Ndu lalap nemani kami.

Ertoto me kita...

c. Guna Pemimpin Bangsa-Bangsa

Mbera-mbera Dibata mereken ukur si pantas ras meteruk ukur man Presiden, Menteri-menteri, gubernur, bupati/wali kota, ras kerina pejabat negara. Mbera-mbera kalak e rusur erdalan ras rayat, metinggel ndengkehken sura-sura ras keperluan masyarakat, janah ngelebeiken kiniulin ras-ras di babo kepentingan sekalak ntah pe terpuk.

Ertoto me kita...

d. Toto guna keperluan lingkungan...

Ertoto me kita...

S. Marilah kita ras-ras notoken “Toto Sinode Diosesan VII Keuskupan Agung Medan” (Hal 2)

10. Toto Bapa Kami

S. Bekas penuruh Penebus ras ikekep ajaren dibata maka pang me kita ertoto: Bapa kami sini surga.....

11. Kolekte

PDM No. 353

12. Toto Penutup

Dibata Bapa si Perkeleng,

Ikataken kami bujur sabab Kam enggo nemani kami bas perpulungen enda. Kam enggo ngingetken kami alu

perbahanan Maria ras Marta, uga pentingna mpesikap waktu guna ndengkehken sora-Ndu ras sora senina-senia kami pe.

Tuhan, pasu-pasu min perdalanen kami gelah kami banca lalap jadi keluarga si metenget, saber ndengkehken, ras radu mpegegehken, maka dame_ndu lalap nemani rumah tangga kami sekalak-sekalak.

Erkitekten Kristus Tuhan kami. Amin.

Ntah toto guna keluarga: PS 162

13. Pasu-Pasu

S. Mbera-mbera Tuhan ras kiat

U. Genduari she rasa lalap

S. Mbera-mbera Dibata si mada kuasa mpegegehi, nemani, mpengasup ras masu-masu kita gelah radu ndengekehken sada ras sidebanna, ibas gelar Bapa, ras Anak ras Kesah Sibadia.

U. Amin

S. Turang ras senina kekelengen, alu bage perpulungenta sipemena alu tema umat Katolik erdalan ras-ras guna radu ndengkehken enggo dung.

U. Bujur man Dibata

14. Penutup

PDM No. 539 / “Lagu Sinode”

PERJUMPAN SI PEDUAKEN
JABU ERDALAN RAS-RAS GUNA RADU
PEPAGUHKEN

1. Lagu Pemena

PDM NO. 579

2. Tanda Silang

S. Ibas Gelar Bapa ras Anak ras Kesah Sibadia

U. Amen

S. Mbera-mbera pemere kekelengen ras dame jue ibas
Dibata, Bapa ras Tuhanta Jesus Kristus, nemani
kita .

U. Genduari ras seh rasa lalap.

3. Kata Penaruh

Mari dage sipenangkih pujin ras pengatakan
bujurta man Dibata Bapa Simadaginiulin, kita idilo
guna pulung labo selaku sekalak- sekalak si pedauh-
dauh tapi selaku sangkep nggeluh umat Dibata. Tema
ibadatta si pemena eme “ **Jabu Erdalan Ras-ras
Guna Radu Megiken**” Mbera-mbera kita kerina
ngasup ngelakokenca alu mehuli e me ndengkehken
sora bapa, nande, anak-anak, ras khususna sora si
rehna ibas Dibata nari.

Tema ibadatta sendah e me : “**Umat Katolik Erdalan
Ras-ras Guna Radu Pepaguhken**”.

Ibas perdalanen geluh kinitekenta. Megati kita
nggejapken ngelabuh, sangsi, selangsa tempa sisada
ngalaken perbeben. Tapi, Kata Tuhan ngingetken kita
maka kita e me ringring ibas sada Kula Kristus. Kita

labo erdalan sisada. Kita erdalan ras ras, radu sijemaken tan, radu pepaguhken, dingen radu sicokong-cokongen.

Tupung lit si kote, si megegeh ncokongsa. Tupung lit si peltep pengarapen, si deban mereken pengarapen. Mbera-mbera arah ibadat jabu enda, kita reh ipersadakenna, kinitekenta pe reh paguhna, janah reh sedarna maka kita e me turang ras senina si radu merluken guna kemulian Gelar-Na.

Mari dage sitalangi pusuh peratenta guna ngalo-ngalo pemere kekelengenn-Na paksa enda.

4. Toto Pemena

S. Mari dage kita ertoto

Allah Bapa yang Maha kasih,

Dibata Bapa Simadakinulin. Bujur ibas enggo ipepulung-Ndu kami ibas ingan enda selaku sada jabu umat Katolik. Labo kap itepa-Ndu kami guna nggeluh mesuki, tapi guna nggeluh ibas persadan ras keleng.

Tuhan Jesus, Kam me dalan Situhu-tuhu. Wari enda kami reh alu tema” Erdalan Ras ras guna Radu Pepaguhken”. Pepaguh min pusuh kami gelah sedar maka kami e me turang ras senina . Bereken man kami pusuh si mesinting guna radu mperdiatken, tan si sikap radu sisampat sampaten, ras alu cakap si ngasup radu mpegeghi.

I tengah doni s idem perbeben enda, ula peturut kami erdalan sisada.

Peresada min jing kang kami, peteguhlah perseninan kami, seh maka alu kiniteken si paguh banci kami ras ras erjing kang nepet ku Kam.

Ipindo kami, pasu-pasu dage ibadat jabu enda, Pelikas min pusuh peraten kami, gelah kerina si ilakoken ras ibelasken kami sendah jadi pasu pasu nandangi sapih sapih kami ras jadi persembahen si ngena ate-Ndu.

Erkitekten Tuhan kami Jesus Kristus, Anak-Ndu si Nggeluh dingen Erkuasa ras Kam ibas persadan Kesah Sibadia seh rasa lalap.

Amin.

5. Ogen Injil Yohanes 20:19-23

6. Pengukuri

Ibas ogen si sendah, kita ngidah mangun ajar-ajar ibas berngi pemena kenca kekeken Jesus. Kalak e pulung ibas sada rumah si pintunna ieruk ngeskes.Engkai? perbahan kalak e sangana dem kebiaren.

Kalak e nggejapken sisada la erteman, kote,ras dem kebiaren. Igejapken kalak e ia bagi tempa itadingken ras ibas cilaka.Tapi kai si terjadi?Jesus reh ras tedis itengah-tengah kalak e. Jesus reh labo guna ngakimi, tapi guna mereken dame dingen pepaguhken. Lit telu tenah si mbages arah perikop enda si lit ubungenna ras tema perjumpanta:

1. Pegegeh Lit ibas Kiniersadan

Kalak e pulung ras-ras. Aminna pe kalak e mbiar, kinirasrasenna e jadi ingan si aman,bage pe nandangi kita jabu si erkiniteken. Kita idilo labo guna ndalani dalan kinitekenta sisada jine. Tupung kita erdalan ras ras, babanta tergejap reh nahangna, ras kebiarenta banci salih jadi kinipangen.

2. Jesus Reh ku Tengah Persadanta.

Nina Jesus :” Mejuah-juah man bandu”

Tupung kita ersada pusuh dengen pulung Jesus lit i tengah-tengaha.Ia reh guna meneken kebiaren, isambarina pengarapen si peltep alu pengarapen si enteguh.Kinitekenta ipepaguh labo erkiteken totonta sekala-sekalak ngenca, tapi perbahan kita nggejapken kerehen Tuhan ibas persadan raduken turang ras seninanta.

3. Kita Isuruh Guna Radu Pepaguhken.

Kenca nehken kata mejuah-juah, nina Jesus:”Bagi Bapa enggo nuruh aku, bagepe aku nuruh kam.”
Je nari iembusken-Na Kesah Sibadia kempak kalak e.

Ertina gegeh si aloken kita ibas Tuhan nari la banci sibuniken guna man banta sisada.Kita idilo guna jadi “tan ras nahe” Jesus nandangi kalak si deban.Adi lit temanta si kote kita si megegeh encokongsa,adi lit temanta si mbiar-mbiar kit mpetetap ukurna,adi lit si guling sidurken tanta guna pekekesa,sialem alemen dengen radu ngaloken, bagi uga enggo ibahan Tuhan man banta.

7. Erbagi Penggejapen

S. Genduari mari dage si pebagesi pengukurinta enda salu penungkunen si iteruh enda guna negu-negu erbagi pengalaman.

1. Ndiganai nge perpudi kal igejapken du anak jabundu si deban mpegegehi tah pe mpegiah ukurndu? Kai si ikataken tah pe si ilakoken kalak e?
2. Perkara kai saja (belas-belas ras pengelako) si megati la sengaja ibelasken/lakoken ras kepeken erbahan

pusuh ceda tah pe erbahan kita surut giah giahta ibas jabu?

3. Adi lit anggota jabu si sangana ndabuh ku bas dosa tah pe si gulut, uga nge arusna pengelakonta rikiutken ajaren Tuhan?

8. Perbahenen si Teridah

- S. Mpekena pengerana: Kata mandangi/kata melket sisambari alu kata-kata si mpegegehi. (Conta: Asangken ngatakan:” Silalap kam salah salih jadi cubaken sidarami dalan si deban si terulin.”)
- S. Erbahan kesemalen “ Sada Pujin Teptep Wari”: Teptep anak jabu min muji tah pe ngergai kiniulin sekalak anak jabu si deban tep-tep wari.
- S. Erjandi guna sitoto-totonken alu ertentun, labo toto sinterem, tapi notoken persoalan ras perbeben si sangana inanami sekalak-sekalak.

9. Toto Pemindon ras Toto Sinode

a. Guna Siminpin Gereja

O Bapa, Bujur ikataken kami arah siminpin Gereja si katawari pe tetap mperdiateken ras mpegiah kami. Bereken min Kesah kepentaren man kalak e gelah ngasup ngerehken Kristus i tengah doni ras negu-negu umat guna njadikan Kata-Ndu selaku pokok kegeluhenna i doni enda.
Mari dage sipindoken...

b. Bagi pemimpin negara

O Bapa, Temani min siminpin Negara kami ibas tugas pengelai minpin Negara kami enda. Pasu-pasulah kalak e gelag ngasup minpin alu kepentaren, kinitruken ukur ras semangat pengelai si tuhu-tuhu.

Pegurlah min semangat pengurbanen ibas diri kalak e, si jadi kesaksin kiniteken nandangi keleng ate-Ndu si nelamatkan.

Mari dage sipindoken...

c. **Guna Kerina si Meritaken Injil, Guru Agama ras Katekis**

O Bapa, ikatakan kami bujur arah pendilon si mulia si ibereken-Ndu kempak kalak si mereken geluhna ibas meritaken Injil ras negu-negu umat-Ndu. Sedarkenlah kerina si meritaken Injil maka Kesah-Ndu si erdahin dengen merkuanken pusuh kalak si ndarami kebenaran. Pegegehi min usaha ras kepuncan kalak e ibas tugas pemeritan mantek percakapen ras kesaksin kiniteken ibas perlagu langkah si teptep wari.

Mari dage sipindoken....

d. **Guna Banta si Pulung i Jenda**

O Bapa, pasu-pasu dage umat-Ndu si pulung i jenda, meritaken pendahin-Ndu sinelamatkan nandangi teptep jelma. Mbera-mbera kiniteken, pengarapen ras keleng ate kami reh paguhna ibas pendahin-Ndu si nelamatkan nandangi teptep jelma. Tegu-tegu min kami gelah nggeluh rikutken kata-Ndu jine ras pengasup min kami guna radu pepaguhken sada ras si debanna.

Mari dage sipindoken...

S. **Mari dage ras-ras sipenangkih “Toto Sinode Diosesan VII Keuskupan Agung Medan”. (Hal 2)**

10. Toto Bapa Kami

S. Bekas penuruh Penebus ras ikepkep ajaren dibata maka pang me kita ertoto. Bapa Kami sini surga...

11. Kolekte

PDM No. 364

12. Toto Pendungi

Dibata Bapa Simadaganjang dingan dem kemulian, ikatakenn kami bujur perbahan kam tetap lit ras nemani kami ibas perjumpa enda. Sampati min kami gelah buah perjumpa enda tuhu-tuhu teridah ibas kegeluhen kami guna radu pepaguhken sada ras si debanna dingan arah perbahana keleng ate bagi siniajarken Anak-Ndu. Tetap dage temani kami gelah lalap punca ngelakoken sura-sura-Ndu. Enda kerina isehken kami man ba-Ndu erkite-kiteken Kristus Tuhan kami.

Amen.

13. Pasu-Pasu

S. Tuhan nemani kita kerina

U. Genduari ras seh ras lalap

S. Mbera-mbera Dibata Bapa Simadakuasa, mpegegehi, nemani, ras mpengasup kita guna radu pepaguhken sada ras si debannaibas gelar Bapa,ras Anak ras Kesah Sibadia.

U. Amen

S. Turang ras senina sinikelengi Tuhan, alu bage perjumpa si peduaken alu tema Umat Katolik Erdalan Ras-ras Guna Radu Pepaguhken enggo dung.

U. Bujur man Dibata.

14. Enden-Enden Pendungi

PDM No. 530 : / “Lagu Sinode”

PERTEMUAN SI PERTELUKEN
JABU ERDALAN RAS-RAS GUNA RADU
SIBERITANKEN

1. Lagu Pembukaan

PDM No. 595

2. Tanda Silang

S. Ibas Gelar Bapa Ras Anak ras Kesah Sibadia

U. Amen

S. Mbera-mbera pemere kekelengen ras dame jue ibas
Dibata, Bapa ras Tuhanta Jesus Kristus
nari,nemani kita.

U. Genduari ras seh rasa lalap.

3. Kata Penaruh

Turang ras senina kekelengen,

Ibas perjumpaan si petelukan enda kita ibabai alu
tema” Jabu erdalan Ras-ras Guna Radu Siberitanken”.
Jabu selaku Gereja si kitik (*ecclesia domestica*)
mbelinkal pengkebetna selaku ingan si pemena
turahna kiniteken , ate keleng, ras biak-biak Kristiani
keluarga selaku sekolah lagu langkah nandangi
anak.Ibas kegeluhen si terus reh belinna dengen dem
perbeben, jabu Katolik idilo guna erdalan ras-ras,
radu pepaguhken rikut meritaken keleng ate Dibata
arah kegeluhen si teptep wari.

Arah perjumpaan enda iarapken kerina jabu Katolik
reh paguhna ibas kegeluhen toto ipersada ibas keleng
ate, dengen ijemba guna meritaken Injil, subuk i

tengah-tengah jabu bage pe i tengah keteremen
jelma. Ibadat jabu enda jadi dalam si tempa la mehaga
tapi erguna ibas ngerehken Tuhan ibas teptep dampar
kegeluhen jabu.

4. Toto Pemena

S. Mari dage kita ertoto

Dibata Bapa Simadakekelengen. Bujur ikataken
kami man ba-Ndu ibas pemere jabu si ipelimiken-Ndu
man kami. Idilon-Ndu kami guna erdalan ras-ras ibas
keleng ate, sicokong-cokongen, ras reh belinna ibas
kinitaken kempak Kam. Tegu-tegu min kami, o Bapa
gelah ibas kiniras-rasen selaku jabu, ngasup kami
radu pepaguhken ras radu meritaken keleng ate-Ndu
arah belas-belas bage pe perbahanen kami si tep-tep
wari. Ajarilah kami gelah punca ibas toto, meteruk
ukur ibas ngelai, dengen dem keleng ate ibas ngalaken
teptep perbeben kegeluhen. Kusekenlah kesah-Ndu
Sibadia gelah teptep jabu kami jadi tanda kerehen-
Ndu si nggeluh, jadi terang ras sira man sapih-sapih
kami, dengen punca ibas pendilon guna meritaken
Injil

Erkiteken Tuhan kami Jesus Kristus, Anak-Ndu si
Nggeluh dengen Erkuasa ras Kam ibas persadan
Kesah Sibadia seh rasa lalap.

Amin.

5. Ogen Injil Matius 28:16-20

6. Pengukuri

Turang ras senina kekelengen,

Injil wari enda maba turi-turin si meherga man banta,
e me penuruhen Jesus nandangi ajar-ajar. Nggutingkal

maka tupung ajar-ajar ngidah Jesus si keke, isembah kalak e Ia, tapi lit denga ka si kurang tek.Si enda encidahken maka kiniteken labo lalap erdalan alu mehuli.Selangsa ajar-ajar pe ngenanami si bagenda rupana.

Tapi, Jesus labo nulak tah pe nilah ibas kalak si kurang tek e.Selangsa ideherina kalak e.Endam keleng ate Tuhan: Ia reh kepe ibas kekoten ras tupung kita lit ibas pusuh erbera-bera.Enda jadi pelajaran man banta maka Tuhan labo mindo kinisertan bas kita nari, tapi kinisikapenta guna tek ras erdalan ras Ia.

Je nari ibere Jesus penuruhen si tangkas: Perintah enda labo guna ajar-ajar tupung paksa si e saja, tapi pe man banta kerina,ikut pe jabu-jabu Katolik paksa genduari enda.Jabu idilo jadi ingan pemena pemeritan kiniteken ija keleng ate, pengampunen ras kiniteken kempak Tuhan iajarken ras igeluhi teptep wari: jabu e me sekolah pemena nandangi anak-anak ras orang tua e me sekolah pemena nandangi anak-anak.Megatikal kita rukur maka meritaken Injil arus ilakoken bas ingan si ndauh tah pe alu cara si mbelin. Selangsa, pemeritan si tangkas kal e kepe imulai alu perkara si kitik:radu sikelengen, radu megiken ertoto ras-ras dingen ncidahkan usihen geluh si mehuli ibas tengah jabu.

Ijandiken Jesus ka pe perkara si mpegegehi:” Aku tetap nemani kam seh ku kedungen jaman,” e ngatakan kita la pernah sisada ibas ndalanken tugas penuruhen enda.Ibas teptep usahanta si kitik guna

nggeluh ibas keleng ate ras meritaken kiniulin, Tuhan tetap ringan ras nemani kita.

Mbera-mbera arah Kata enda, kita selaku jabu Katolik reh buena ngaloken pergegeh guna erdalan ras-ras , si cokong-cokongen, dingan pang meritaken keleng ate Kristus ibas kegeluhenta si teptep wari.

7. Erbagi Pengejapen

- S. Genduari mari dage si pebagesi pengukurinta enda salu penungkunen si reh enda guna negu-negu erbagi pengalamen.
1. Siakap kai nge ertina “meritaken ibas kegeluhen si teptep wari?
 2. Kai saja enggo silakoken i tengah-tengah jabu guna meritaken dame ras keleng ate Kristus?
 3. Enggo kin jadi sada kesemalen i tengah jabu guna man, ertoto ras ngoge Pustaka Sibadia alu ras-ras?
 4. Kai perbeben si mbelinna man banta ibas meritaken keleng ate Kristus?

8. Perbahanen si Teridah

- S. **Erdalan ras-ras ibas kiniteken arah toto si jadi pergegeh guna meritaken.**

Desken ajar-ajar si reh kempak Jesus, jabu iajuk guna tetap reh man Tuhan arah toto ras-ras .Arah toto enda me jabu ndatken gegeh guna ngelakoken penuruhen: “Laweslah janah jadikanlah kerina bangsa ajar-ajar-Ku.” Alu bage, toto jadi sumbul si pokok ibas meritaken keleng ate Tuhan.

S. Meritaken arah geluh si teptep wari amin pe lit kekoten ras pusuh erbera-bera.

Ajar-ajar tetap isuruh aminna pe kalak e erbere-bera pusuh. Bage ka pe jabu, tetap idilo guna meritaken Injil arah keleng ate, pengampunen, ras kininggiten emperdiatekan. Ibas kegeluhen siteptep wari jabu jadi saksi Kristus arah perbahanen si teridah, dengen tek nandangi jandi-Na: Aku tetap nemani kam.”

9. Toto Pemindon ras Toto Sinode

a. Guna Siminpin Gereja

O Bapa Simadaginiulin, ertoto kami guna Paus, kerina Uskup, Malim ras kerina singelai Gereja. Kusekenlah Kesah Sibadia-Ndu nandangi kalak e, gelah katawri pe punca ibas pendilonna selaku permakan umat-Ndu. Pegegehilah kalak e ibas kiniteken pepaguh ia ibas pengarapen, dengen demilah kalak e alu keleng ate ibas pengelan. Mbera-mbera arah usihen geluhna, reh paguhna dengen reh ersadana ia ibas keleng ate Kristus.
Mari Dage Sipindoken...

b. Guna Siminpin Negara ras kerina si natang layar-layar

O Bapa, Simadaginiulin ertoto kami guna kerina siminpin Negara ras si natang layar-layar. Berekenlah man kalak e kepentaren, kinibujuren, ras pusuh si tutus gelah ngasup ndalanken pendahinna alu rembang tengah, mpelebeken kejuen rayat, dengen njaga persadan ras perdamen. Mari dage sipindoken...

c. **Guna kerina si meritaken Injil**

O Bapa, Simadaginiulin ertoto kami guna kerina simeritaken Injil. subuk kerina misionaris bage pe umat si erkitaken si isuruh. Pegegehilah kalak e alu kesah-Ndu Sibadia, gelah punca ibas persuruhan, pang ibas ngalaken perbeben, dingentutus meritaken keleng ate Kristus arah pengerana ras perbahanen.

Mari dage sipindoken...

d. **Guna banta kerina si pulung**

O Bapa Simadaginiulin, kami ertoto guna kerina si pulung i jenda. Pepaguh min kinitaken kami, persadaken min kami ibas keleng ate, dingensampati min kami guna punca nggeluh rikutken sura-sura-Ndu dingen pang meritaken keleng ate Kristus ibas kegeluhen si teptep wari

Mari dage sipindoken...

S. Marilah kita bersama-sama mamanjatkan doa
“Sinode Diosesan VII Keuskupan Agung Medan”
(Hal 2)

10. Toto Bapa Kami

S. Bekas penuruh Penebus ras ikekep ajaren dibata maka pang me kita ertoto: Bapa kami sini surga.....

11. Kolekte

PDM No. 359:

12. Toto Pendungi

Dibata Bapa Simadaginiulin, ikataken kami bujur ibas kiniersadan kami ibas ibadat enda. Enggo idengkehken kami kata-Ndu ras enggo ipenangkih kami toto man ba-Ndu. Mbera-mbera ipepaguh-Ndu kinitaken kami, ipegegehi-Ndu kami guna punca ndalankenn pendilon selaku jabu guna radu

siberitanken keleng ate-Ndu ibas kegeluhen si teptep wari. Temani kami ibas teptep perjinkang geluh kami, gelah kai si enggo irayaken kami enda tuhu-tuhu igeluhi kami ibas perbahanen si tangkas teridah. Erkite-kiteken Kristus Tuhan kami.

Amin.

13. Pasu-Pasu

S. Tuhan nemani kita kerina

U. Genduari ras seh ras lalap

S. Mbera-mbera Dibata Bapa Simadakuasa, mpegegehi, nemani ,ras mpengasup ras masu-masu kita guna radu siberitanken sada ras si debanna, ibas gelar Bapa, ras Anak, ras Kesah Sibadia.

U. Amin

S. Turang ras senina kekelengen, alu bage perjumpanta si petelukan alu tema umat Katolik Erdalan Rras-ras Guna Radu Siberitanken enggo dung.

U. Bujur man Dibata.

14. Pendungi

PDM No. 598 : /“Lagu Sinode”

PERJUMPAN SI PEEMPATKEN
JABU KATOLIK SI SINODAL RAS
ERKARAKTER

1. Lagu Pemena

PDM No. 328:

2. Tanda Silang

S. Ibas Gelar Bapa Ras Anak ras Kesah Sibadia

U. Amen

S. Mbera-mbera pemere kekelengen ras dame jue ibas

Dibata, Bapa ras Tuhanta Jesus Kristus, nemani kita.

U. Genduari ras seh rasa lalap.

3. Kata Penaruh

Sendah pulung ka kita mulihi ngumputi perjumpanta guna encakapken materi sub tema si peempatken. Sope bengket ku tema si peempatken, lit denga kin kita ngingetsa tema 1,2 ras 3 ? (banci ibere kesempatan man umat guna njabap). Merandal tema peempatken si icakapken kita me wari si sendah e me: **Jabu Katolik si Sinodal Ras Erkarakter.** Tema enda emkap terasna arah kerina tema-tema si sope si enda.

Jabu Katolik si Sinodal ras erkarakter si imaksud e me Jabu si erdalan ras-ras guna radu sibeginken ras sapih-sapihta ras sora Tuhan. Jabu Katolik si radu pepaguhken subuk ibas kekoten, ras jabu si ngasup meritaken geluhna rikuitken kata Tuhan, bagepe jabu si lit bas ia sukat-sukat ertentun lagu langkah si emkap ulih arih ersada anggota jabu.

Arah penaktaki tema enda iarpken kerina umat Katolik i Keuskupen Agung Medan jadi jabu si nggeluhi isi si meherga bas Injil nari, seh maka ngasup meritaken kesaksin geluhna ibas kegeluhen si teptep wari.

4. Doa Pemena

Dibata Bapa Simadakekelengen,
Bujur Idilon-Ndu kami guna nggeluh selaku sada jabu ibas keleng ate ras persadan.Kuseken min Kesah-Ndu Sibadia man kami, gelah ngasup kami erbuahken Kesah ibas kegeluhen jabu kami: keleng ate, keriahen ukur, dame kejuen, saber ate, dingen ngkuasai diri.
Tegu-tegu min kami gelah jadi jabu si Sinodal ras erkarakter si erdalan ras-ras ibas terang keleng ate-Ndu.Erkite-kiteken Tuhan kami Yesus Kristus si nggeluh dingen erkuasa ras Kam ibas persadan Kesah Sibadia, Dibata seh rasa lalap.

Amin.

5. Ogen Galatia 5:16-26

6. Pengukuri

Turang- senina ras jabu kekelengen...

Jabu e me sekolah si pemena ras pokok ingan pemakon nilai-nilai karakter nandangi anak-anak.Jabu selaku sekolah , tentu urang tua me selaku guru.(Si enda sue ras Tri Tugas urang tua e me Selaku Guru, Malim ras Permakan). Selaku guru ibas jabu, tentu labo ngajarken nilai-nilai karakter ngenca kempak anak, tapi pe ngajarken nilai-nilai kiniteken. Nilai-nilai kiniteken si erpalas guna isuanen man anak e me bagi uga Kata Dibata si enggo sibegiken

ras-ras si ibuat ibas Kitap Galatia 5 :16 - 26, terlebih ibas ayat si 22-23

e me,: Tapi ulih Kesah Sibadia e me: lit kekelengen,lit keriahen dingin lit kemalemen ate,lit kesabaren,idalankenna perbahanen si mehuli,mehuli ia, punca.Meteruk ukurna dingin ngasup engkuasai diri.,,,”. Kata Tuhan sendah ngingetken maka jabu si nggeluh ibas Kesah Sibadia erbuahken buah si mejile. Kata Tuhan enda pe nandesken maka” Buah Kesah” selaku siwah karakter si arus icidahken kalak si ipinpin Kesah.Selangsa ayat enda nggambarken maka Kristus labo terjeng aturen ras pengelako kula, selangsa jadi tanda sekalak jelma si tek janah tuhu-tuhu ipelimbarui Kesah.Buah kesah ngajarken maka karakter si tuhu-tuhu labo ipopo aturen ras tekanen sosial ngenca, tapi arah ubungen si nggeluh ras Tuhan.

Kata Tuhan enda jadi pengu-negun Biblis nandangi jabu Katolik si erkarakter. Alu bage jabu Katolik si Sinodal ras erkarakter banci ikataken bagenda: Jabu Katolik si radu si begin sada ras si debanna,dingin megiken sora Tuhan, Radu pepaguhken tupung kote, ras ngasup meritaken nilai-nilai kiniteken ibas kegeluhen si teridah, dingin nggeluhi buah Kesah lit bas ia sukat-sukat taktak pengelako si emkap ulih kinisadan arih anak jabu,bage pe banci jadi si peturahken ukur nandangi jabu si deban. Alu lebih ertorosen, jabu erkarakter em kapken: Perbulangen Erkarakter,Ndehara Erkarakter,

Anak Erkarakter, ras rumah si ikut ersora ncokong anak jabuna jadi Erkarakter.

7. Erbagi penggejapen

S. Turang ras Senina genduari mari dage sipebagesi pengukuri enda salu penungkunen si iteruh enda guna negu-negu erbagi penggejapen kerna pengalamaenta.

1. Buah kesah siapai si meserana kal ipraktekken ibas tengah jabunta?
2. Kai nge perbeben si mbelinna kal ibas njaga kinisadan arih i tengah-tengah jabu?
3. Uga nge tempas : Perbulangen erkarakter, Ndehara erkarakter, ras anak erkarakter?
4. Kai perkara si kitik si banci silakoken alu la monce guna petangkas teridahken jabu si erkarakter?

8. Perbahanen si Teridah

Kenca encakapken tema si peempatkan enda, kai perbahanen si teridah si banci silakoken?

Umpamana:

1. Erbahan torosen paksa ertoto i tengah jabu
2. Erbahan kinisadan arih i tengah jabu
3. Nusun pembagin dahin teptep anak jabu
4. Rsd.

9. Toto Pemindon ras Toto Sinode

a. Guna Siminpin Gereja

O Bapa Simadaperkuahate, ikataken kami bujur nandangi siminpin Gereja kami si enggo mereken dirina selaku singelai man umat-Ndu. Bere min buah kesah nandangi kalak e seh maka reh ngasupna

ibas meritaken keleng ate-Ndu ibas geluhna, dingn
ngasup jadi usihen man kami.

Mari dage sipindoken...

b. **Guna Siminpin Negara**

O Bapa Simadakepentaren, Kuseken min Kesah
kepentaren-Ndu man Siminpin Negara ras Bangsa
kami, gelah katawari pe erdahin mpelebeken kejuen
ras keadilan man rayat si enterem. Janah bereken min
ukur si ergiah-giah man kalak e gelah lalap nggit
erjuang guna kemajun bangsa ras Negara kami.

Mari dage sipindoken...

c. **Nandangi Jabu**

O Bapa sumbul nasa kiniulin, pasu-pasu min kerina
jabu si lit i lingkungan kami enda.

Tegu-tegu min kami gelah ngasup radu
sibegin, pepaguhken ras siberitanken, dingn ngasup
ka pe nggeluhi buah kesah-Ndu, seh maka kami jadi
jabu erkarakter ras jadi usihen nandangi kerina jabu
si deban i sekelewet kami.

Mari dage.....

d. **Wujud doa lingkungan...**

S. Marilah kita bersama-sama mamanjatkan doa
“Sinode Diosesan VII Keuskupan Agung Medan”

10. Toto Bapa Kami

S. Marilah Bekas Penuruh Penebus ras ikepkep ajaren
dibata maka pang me kita ertoto: Bapa kami
sinisurga...

11. Kolekte

PDM No. 360 :

12. Toto Pendungi

Ermengkah ate ras ikataken kami bujur man ba-
Ndu o Bapa, Enggo itegu-tegu-Ndu kami ibas
perjumpa berngi enda. Mbera-mbera arah kata-Ndu
ras erbagi penggejapen kami, kerina jabu kami pe reh
ipepaguhna. Ras mbera-mbera alu erdalan ras-ras, reh
ersadana arih kami dengen sepengodak sepengole.
Kerina enda isehken kami erkiteken Kristus Tuhan
kami. Amin.

13. Pasu-Pasu

S. Mbera-mbera Dibata nemani kita

U. Genduari seh rasa lalap

S. Mbera-mbera Dibata Simadakuasa mpepaguh ras
masu-masu kita nepet jabu erkarakter, ibas gelar
Bapa, ras Anak, ras Kesah Sibadia

U. Bujue man Dibata

14. Penutup

PS No. 541 / “Lagu Sinode”